



Bosna i Hercegovina
Federacija Bosne i Hercegovine
Kanton Sarajevo
OPĆINA VOGOŠĆA
OPĆINSKI NAČELNIK
Stručna služba za poslove
Općinskog vijeća



Vogošća, ul. Jošanička br. 80, tel: 00387 33 586 412, 586-407

Broj: 12-04-sl./25
Vogošća, 31.12.2025. godine

VIJEĆNIČKA PITANJA
POSTAVLJENA NA 13. REDOVNOJ SJEDNICI OPĆINSKOG VIJEĆA VOGOŠĆA
održanoj 30.12.2025. godine

Na 13. redovnoj sjednici Općinskog vijeća vijećnik **Efendić Emir (u ime Kluba vijećnika S BiH)** postavio je slijedeća vijećnička pitanja:

- 13/1.** Postavljam pitanje prema nadležnoj općinskoj službi, da nam se odgovori ko je nadležan za vanjsko održavanje fasada i druga uređenja na objektu Kulturno-sportskog centra. Naime, u navedenom objektu se nalaze prostori koji se izdaju i za koje se naplaćuje zakup. Međutim, na vanjskom dijelu pojedinih prostora su izrasle biljke (puzalica) koje zauzima gelendere na prozorima objekata koji niko ne uklanja, a to izgleda veoma ružno i zapušteno. Takođe ulazna vrata na pojedinim prostorima su u veoma lošem stanju, oštećena su i dotrajala, te bi bilo potrebno popraviti ili zamjeniti ista, kako bi bila funkcionalna i služila njihovoj svrsi.
- 13/2.** Po drugi put postavljamo pitanje, obzirom da po istom nije ništa urađeno. Kada će biti sanirano oštećenje asfaltna površina koja se nalazi na kolovozu raskrsnice ulica Akifa ef. Biserovića i Uglješići u neposrednoj blizini mosta kod Srednjoškolskog centra, te kada će biti uklonjen zemljani nanos koji je nastao usljed oborinskih voda na istoj raskrsnici. Naime, već duži vremenski period oštećen je kolovoz na navedenoj raskrsnici (rupa) i na istom mjestu se nalazi zemljani nanos nastao usljed oborinskih voda, a koji je suzio kolovoznu površinu. Navedeno ugrožava normalno odvijanje saobraćaja kroz raskrsnicu, naročito prilikom mimoilaženja vozila pri prolasku kroz raskrsnicu, te bi oštećenje bilo potrebno sanirati, a zemljani nanos ukloniti kako bi se olakšalo i normalizovalo odvijanje saobraćaja u navedenoj raskrsnici.

Vijećnik **Cvrk Čamil (u ime Kluba vijećnika DF)** postavio je slijedeće vijećničko pitanje:

- 13/3.** Da li je Općina Vogošća radila, ako jeste, kada poslednji put, analizu broja parking mjesta i broja registrovanih vozila u urbanom dijelu općine. Jedna takva analiza bi pomogla u sagledavanju postojećeg stanja i planiranju mjera da se riješi ili barem ublaži problem manjka parking mjesta.

Vijećnica **Karović Amra (u ime Kluba vijećnika SDP)** postavila je slijedeće vijećničko pitanje:

- 13/4.** Postavljam pitanje zašto nije u funkciji javni WC u Vogošći.
Obrazloženje:
Obzirom da postoji prostor odnosno objekat koji služi kao javni WC na lokaciji autobusnog i taxi stajališta, zbog čega isti nije u funkciji. Svako veće naselje i grad moraju i trebaju imati javni WC. Tržni centri i javne ustanove ne mogu biti mjesto gdje prolaznici samo uđu da bi koristili toalet. Veći broj penzionera i ljudi starije životne dobi, uposlenici javnog gradskog saobraćaja, taxi prevoznici pa i djeca nisu u prilici da u toku dana odlaze svojim kućama zbog korištenja toaleta. Zbog toga smo često svjedoci vrlo neuglednih prizora po parkovima i sličnim mjestima. Molim nadležne za rješavanje ovog pitanja.

Vijećnik **Handžić Jasmin (u ime Kluba vijećnika SDA)** postavio je slijedeća vijećnička pitanja:

- 13/5.** Pitanje upućujem Službi za zapošljavanje Kantona Sarajevo. Koji iznos finansijskih sredstava planiranih za realizaciju aktivnih mjera zapošljavanja u Kantonu Sarajevo u posljednje tri

godine nije bio realizovan, po godinama. Molim da se navedu i osnovni razlozi zbog kojih planirana sredstva nisu utrošena u predviđenom obimu. Također, koje aktivne mjere zapošljavanja JU Služba za zapošljavanje Kantona Sarajevo planira realizirati u narednoj godini, te koji su planirani iznosi finansijskih sredstava za svaku od tih mjera.

- 13/6.** Postavljam pitanje nadležnoj općinskoj službi, da li je Općina Vogošća pokrenula proceduru izrade projektne dokumentacije za projekat vodosnabdijevanja, odnosno rekonstrukcije i sanacije vodovodne mreže Gornja Jošanica III - naselje Bradići. Ukoliko jeste, molim da se dostave informacije u kojoj je fazi navedena procedura. Ukoliko procedura nije pokrenuta, molim obrazloženje razloga i informaciju da li se planira pokretanje procedure u narednom periodu.

Vijećnica **Šabić Dalia (u ime Kluba vijećnika DF)** postavila je slijedeće vijećničko pitanje:

- 13/7.** Zbog velikog broja upita građana, postavljam pitanje nadležnoj općinskoj službi da li postoji plan sanacije i asfaltiranja ulice koja se nalazi preko puta Srednjoškolskog centra, s druge strane rijeke, a koja se proteže od Srednjoškolskog centra do naselja Uglješići. Naime, jedan dio navedene ulice je asfaltiran, dok je drugi dio i dalje neasfaltiran i u izrazito lošem stanju. Na tom dijelu se konstantno pojavljuju velike rupe i oštećenja, koja se privremeno saniraju nasipanjem šljunka, ali se isti usljed padavina brzo ispere, nakon čega nastaju duboki krateri i dodatna oštećenja kolovoza. Takvo stanje otežava svakodnevno kretanje stanovnicima ovog područja i predstavlja potencijalnu opasnost za saobraćaj. Posebno je važno istaći da se ovom ulicom često kreću vaspitačice sa djecom iz obdaništa, srednjoškolci, kao i brojni pješaci, jer se radi o pravcu koji se često koristi za šetnju zbog blizine rijeke i zelenog pojasa. U postojećem stanju, ova dionica ne pruža adekvatne uslove za sigurno i dostojanstveno kretanje naših sugrađana niti za normalno i sigurno odvijanje saobraćaja. Imajući u vidu navedeno, smatramo da bi ovu ulicu trebalo ne samo sanirati i asfaltirati, već dugoročno planski urediti, kako bi postala funkcionalna, sigurna i ugodna saobraćajnica i pješačka zona, u skladu s potrebama građana i potencijalima prostora. Molim nadležnu službu za informaciju da li je asfaltiranje ovog dijela ulice planirano, u kojoj fazi se eventualno nalazi projekat, te o mogućim rješenjima za sanaciju navedene ulice.

Vijećnik **Hebib Armin (u ime Kluba vijećnika SDP)** postavio je slijedeća vijećnička pitanja:

- 13/8.** U kojoj se konkretnoj fazi trenutno nalazi izrada Programa gospodarenja poljoprivrednim zemljištem u državnom vlasništvu na području Općine Vogošća.

Obrazloženje:

Na prethodnim sjednicama Općinskog vijeća uputio sam inicijativu za izradu i Programa gospodarenja poljoprivrednim zemljištem u državnom vlasništvu na području Općine Vogošća, s ciljem sveobuhvatnog uređenja ove oblasti i omogućavanja transparentnog i zakonitog davanja zemljišta u zakup putem javnog poziva na području Općine Vogošća. Tom prilikom inicijativa je prihvaćena. Molim da mi se dostavi informacija:

1. U kojoj se konkretnoj fazi trenutno nalazi izrada Programa gospodarenja poljoprivrednim zemljištem u državnom vlasništvu na području Općine Vogošća.
2. Koje su dosada provedene aktivnosti i šta je preostalo do finalizacije nacrtu.
3. Kada se može očekivati upućivanje ove odluke u dalju proceduru pred Općinsko vijeće.

- 13/9.** U kojoj se konkretnoj fazi trenutno nalazi izrada javnog registra poslovnih i stambenih prostora u vlasništvu Općine Vogošća .

Obrazloženje:

Na prethodnim sjednicama Općinskog vijeća uputio sam inicijativu za izradu javnog registra poslovnih i stambenih prostora u vlasništvu Općine Vogošća. Tom prilikom sam dobio odgovor da je nadležna općinska služba započela aktivnosti na pripremi navedenog javnog registra. Molim da mi se dostavi informacija:

1. U kojoj se konkretnoj fazi trenutno nalazi izrada javnog registra.
2. Koje su do sada provedene aktivnosti i šta je preostalo do finalizacije.

Vijećnik **Omerović Denis (u ime Kluba vijećnika SDP)** postavio je slijedeća vijećnička pitanja:

- 13/10.** S obzirom na učestale obustave vodosnabdijevanja u ulici Hilme Krke tokom čitave godine zbog nezadovoljavajućeg kvaliteta vode, koje traju i do 7–10 dana, koje konkretne mjere

nadležni planiraju poduzeti kako bi se ovaj problem trajno riješio i spriječilo njegovo ponavljanje, te zašto u periodima obustave nije obezbijedena alternativna opskrba vodom za stanovništvo.

- 13/11.** Da li su projektnim planom za vodosnabdijevanje gradskim vodovodom u naselju Svrake obuhvaćene i kuće koje se nalaze na dionici od skretanja za Miholjice pa do kraja puta, odnosno skretanja za naselje Ravne. Molim za informaciju da li je navedeni dio naselja obuhvaćen postojećim projektom ili je njegovo uključivanje planirano u projekat.

Vijećnik **Selimović Bego (u ime Kluba vijećnika SDA)** postavio je slijedeće vijećničko pitanje:

- 13/12.** Obzirom da je za MZ Svrake spajanje puta Svrake-Krivoglavci-Vogošćanska petlja nulti prioritet već nekoliko godina, građane MZ Svrake i dijela MZ Vogošća I interesuje šta se događa i što to stoji u mirovanju već dvije godine. Ako ima nekih neriješenih imovinsko-pravnih odnosa, molim nadležnu službu da se više angažuje i riješi to pitanje, jer ovoj dionici gravitira veliki broj stanovnika, a zimi je ugrožen i prijevoz učenika prema OŠ „Porodice ef. Ramić“.

Vijećnica **Curić Samira (u ime Kluba vijećnika SDP)** postavila je slijedeća vijećnička pitanja:

- 13/13.** Postavljam pitanje vezano za stanje grijanja u Kulturno-sportskom centru Vogošća. Naime, u sklopu Kulturno-sportskog centra nalazi se kino sala i prateće prostorije koje se redovno koriste za probe folklora, koje pohađa oko 200 djece. Međutim, navedeni prostori nemaju kontinuirano grijanje. Grijanje se uključuje samo u rijetkim prilikama kada se u sali održava neka manifestacija ili aktivnost i to u veoma ograničenom trajanju, s obzirom na to da je za postizanje ugodne temperature potrebno više dana neprekidnog grijanja. Prema dostupnim informacijama, Kulturno-sportski centar je priključen na sistem grijanja Bags Energotehnika, te se postavlja pitanje zašto grijanje nije stalno omogućeno, posebno imajući u vidu da djeca tokom redovnih proba borave u izrazito hladnim prostorijama i da se, usljed niskih temperatura, smrzavaju, što može imati negativne posljedice po njihovo zdravlje. Stoga molim nadležne da daju odgovor da li postoji mogućnost uvođenja konstantnog grijanja u kino sali i pratećim prostorijama Kulturno-sportskog centra Vogošća. Ukoliko ne, koji su razlozi za to i koje mjere se planiraju poduzeti kako bi se osigurali adekvatni uslovi za boravak djece i odvijanje kulturno-umjetničkih aktivnosti.

Vijećnik **Pašagić Almir (u ime Kluba vijećnika SDP)** postavio je slijedeća vijećnička pitanja:

- 13/14.** Zašto zgrada policijske stanice Vogošća nema led natpis "Policija" vidljiv sa glavne saobraćajnice kako bi vozači imali vizualnu informaciju da je to zgrada policije. Natpis "Policija" u led formatu, plave boje, treba da bude vidljiv mnogim vozačima i putnicima u automobilima koji ulaze glavnom saobraćajnicom u grad Sarajevo, jer time bi se stvorila sigurnost, a ujedno bi se bolje poštovao pješački prelaz izmedju Doma zdravlja i Policije odnosno Općine Vogošća. Led naziv POLICIJA, plave boje, treba postaviti na zidu zgrade koji je vidljiv vozačima i pješacima, sa glavne saobraćajnice, a ne na glavnom ulazu u zgradu.
- 13/15.** Da li nadležne službe općine Vogošća daju saglasnost za postavljanje i određuju boje fasada stambenih zgrada. Da li se daje saglasnost na postavljanje fasada, njihovih boja, dogradnju raznih balkona, šupa, nadstrešnica i nelegalnih garaža i odlaganje drva pored zgrada koja se koriste za loženje, a ujedno ispod balkona ovih zgrada sada su skloništa velikog broja pasa u našoj opštini koji predstavljaju opasnost za djecu i starije građane.

Dostaviti:

1. Naslovu
2. a/a

RUKOVODILAC
STRUČNE SLUŽBE ZA POSLOVE
OPĆINSKOG VIJEĆA

Crvenjak Elvir



Bosna i Hercegovina
Federacija Bosne i Hercegovine
Kanton Sarajevo
OPĆINA VOGOŠĆA
OPĆINSKI NAČELNIK
Stručna služba za poslove
Općinskog vijeća



Vogošća, ul. Jošanička br. 80, tel: 00387 33 586 412, 586-407, fax: 586-407

Broj: 12-04-sl./25
Vogošća, 31.12.2025.godine

INICIJATIVE POKRENUTE
NA 13. REDOVNOJ SJEDNICI OPĆINSKOG VIJEĆA VOGOŠĆA
održanoj 30.12.2025. godine

Na 13. redovnoj sjednici Općinskog vijeća vijećnik **Turković Faruk (u ime Kluba vijećnika SDA)** pokrenuo je slijedeće inicijative:

13/1. Polazeći od primjera Grada Bihaća, koji je nakon višemjesečne pravne borbe dobio spor protiv priređivača igara na sreću i time potvrdio zakonitost odluke o povećanju komunalnih taksi za kladionice, predlažem se da u Općinskom vijeću Vogošća pokrenemo sličan proces. Kladionice i drugi priređivači igara na sreću ostvaruju ogromne prihode, dok je njihova obaveza prema lokalnoj zajednici kroz komunalne takse minimalna i nedovoljna. S obzirom na to da značajan dio prihoda ovih objekata odlazi izvan naših općina, neophodno je osigurati da općine kao lokalne zajednice u kojima posluju imaju veći i pravedniji finansijski benefit. Dodatno, evidentno je da pojedini objekti rade protivno zakonskim regulativama, jer se nalaze u neposrednoj blizini škola i vjerskih objekata, što je izričito zabranjeno. Time se dodatno ugrožava socijalna sigurnost i zdrav razvoj mladih. Uzimajući u obzir pozitivne sudske odluke u korist Grada Bihaća koje potvrđuju zakonitost povećanja komunalnih taksi, našu političku odluku SDA da u svim lokalnim zajednicama idemo u istom pravcu, društvenu odgovornost koju bi priređivači igara na sreću morali imati prema zajednici iz koje ostvaruju prihode, predlažem sljedeću inicijativu:

1. Da pokrenemo proceduru uvođenja odluke o komunalnim taksama kojom će se značajnim iznosima taksi tretirati priređivači igara na sreću, uz minimalno povećanje osnovnog iznosa na 20.000 KM i za svaki aparat dodatnih 5000KM.
2. Da precizno definišemo namjenu prikupljenih sredstava, prvenstveno za projekte usmjerene ka djeci, mladima, porodici, sportu i kulturi;
3. Da nadležne službe izvrše nadzor nad lokacijama kladionica i sličnih objekata, te da izrade registar onih koji posluju mimo propisanih udaljenosti od obrazovnih i vjerskih objekata;
4. Kroz odluku o povećanju komunalnih taksi, pored povećanja osnovnog iznosa, predlažem da uvedemo i dodatni koeficijent u vrijednosti 2 za sve kladionice koje posluju po ranijim rješenjima, a koje krše važeći zakon u pogledu udaljenosti od obrazovnih i vjerskih objekata.

Ovakvom odlukom Općina Vogošća bi se pridružila pozitivnim praksama, te bi kao Općina iz Kantona Sarajevo ohrabrila i druge manje lokalne zajednice u Bosni i Hercegovini, štiteći interese svojih građana, a naročito mladih generacija koje su najizloženije negativnim posljedicama igara na sreću.

Vijećnik **Efendić Emir (u ime Kluba vijećnika S BiH)** pokrenuo je slijedeće inicijative:

13/2. Pokrećem inicijativu prema nadležnoj općinskoj službi, da borci na području općine Vogošća imaju prednost pri ovjeri dokumenata i pravo na besplatnu ovjeru dokumenata u šalter sali.

Obrazloženje:

Obzirom da su u šalter sali veoma često dešavaju gužve prilikom ovjere dokumenata, podnosim inicijativu da borci prilikom ovjere dokumenata imaju prednost, kao i da ne plaćaju taksu prilikom ovjere dokumenata. Naime, česta je pojava da pripadnici boračke populacije čekaju u redovima za ovjeru dokumenata, a to su građani koji moraju imati privilegije i prema kojim moramo imati poseban senzibilitet. To su ljudi koji su već u zrelim godinama ili dubokoj

starosti, a dali su mnogo za odbranu naše domovine. S tim u vezi, potrebno je obezbijediti da navedena kategorija prilikom ovjere dokumenata ima prednost kako ne bi čekali u redovima za ovjeru. Također, potrebno je usvojiti da borci koji ovjeravaju dokumente budu oslobođeni plaćanja takse, odnosno da navedenu taksu sufinansira općina iz budžeta.

- 13/3.** Pokrećem inicijativu prema nadležnoj općinskoj službi da se izvrši izmještanje autobusnog stajališta u ul. Jošanička bb i pretvaranje lijeve saobraćajne trake u parking prostor.

Obrazloženje:

Naime, svjedoci smo problema sa mirujućim saobraćajem, saobraćajnim gužvama u Vogošći i da je svakim danom sve manje mjesta za parkiranje motornih vozila naročito u užem jezgru Vogošće. S tim u vezi, kako bi uticali na smanjenje gužve u saobraćaju i obezbijedili dodatni prostor za parkiranje vozila u ul. Jošanička, potrebno je ukinuti ili izmjestiti autobusko stajalište koje se nalazi na kolovoznoj površini navedene ulice. Autobusko stajalište se nalazi oko 150 metara od autobuske stanice u istoj ulici, tako da je građanima omogućeno da za potrebe prevoza koriste autobusku stanicu koja se nalazi nedaleko od predmetnog autobusnog stajališta. Ukidanjem ili izmještanjem navedenog autobusnog stajališta oslobodila bi se desna saobraćajna traka za saobraćaj motornih vozila, smanjile gužve koja nastaje prilikom zaustavljanja autobusa na navedenom stajalištu. Povećao bi se prostor za parkiranje motornih vozila u lijevoj saobraćajnoj traci, koju bi u potpunosti trebalo pretvoriti u parking.

Vijećnik **Cvrk Čamil (u ime Kluba vijećnika DF)** pokrenuo je slijedeću inicijativu:

- 13/4.** Pokrećem inicijativu za inspekcijski nadzor i sanaciju neadekvatno izvedenih radova u ulici Donja Jošanica 1 (od broja 4 do 180).

Obrazloženje:

U ime građana ulice Donja Jošanica 1, od kućnog broja 4 do broja 180, podnosim inicijativu za hitan inspekcijski nadzor i sanaciju kolovoza nakon radova koje je vršila Elektroprivreda BiH, a koji su se odnosili na polaganje elektro-kablova duž navedene ulice. Nakon završetka radova, kolovoz je djelimično saniran i asfaltiran, međutim sanacija je izvedena neadekvatno i nekvalitetno. Asfalt je u kratkom roku ulegao, pojavile su se neravnine, udarne rupe i oštećenja, što otežava normalno odvijanje saobraćaja i predstavlja rizik za vozila i pješake. S obzirom na to da se radi o dužem potezu ulice i da je stanje kolovoza svakim danom sve lošije, smatramo da je neophodno:

1. Da nadležna općinska inspekcija izađe na teren, utvrdi činjenično stanje i odgovornost izvođača radova;
2. Da se utvrdi da li su radovi i sanacija izvršeni u skladu sa tehničkim standardima i uslovima izdatim u odobrenju za izvođenje radova;
3. Da se naloži izvođaču radova da izvrši kvalitetnu i trajnu sanaciju kolovoza, vraćajući saobraćajnicu u prvobitno ili odgovarajuće stanje.

Naglašavamo da je navedena ulica frekventna i da ovakvo stanje direktno utiče na sigurnost saobraćaja i kvalitet života stanovnika ovog dijela općine. Molimo nadležne službe da ovu inicijativu razmotre i u skladu sa svojim ovlaštenjima preduzmu potrebne mjere.

Vijećnica **Karović Amra (u ime Kluba vijećnika SDP)** pokrenula je slijedeće inicijative:

- 13/5.** Pokrećem inicijativu da se djeci sa postavljenim dijagnozama lošeg držanja, skoliozom i kifozom omogući korištenje bazena bez plaćanja u trajanju od tri mjeseca u toku jedne kalendarske godine.

Obrazloženje:

Nakon sistematskih pregleda školske djece u toku 2025. godine (od januara do decembra 2025. godine), uočen je povećan broj djece sa problemima koštano mišićnog sistema u smislu lošeg držanja, loše posture i strukturalnih promjena kičmenog stuba. Mnogo djece je sa već povećanim indeksom tjelesne mase, te mnogo je djece koja zbog mjesta stanovanja i finansijskih sredstava nisu u mogućnosti baviti se sportom. Težina ruksaka, neadekvatna fizička aktivnost i ekranizacija su uveliko dovela do sve većeg broja djece koja se javljaju i bivaju uključena u kineziterapiju i fizikalne tretmane već u ranom djetinjstvu. Zbog toga smatram da se usvajanjem ove inicijative može značajno poboljšati i unaprijediti zdravlje naše najmlađe populacije.

- 13/6.** Pokrećem inicijativu da se u očisti i uredi prostor iza vrtića Amel i Nur u ulici Tome Mendeša.
Obrazloženje:

Pomenuti prostor iza vrtića koji se nalazi između parcela koje se obrađuju i zasijavaju, prema ulici 24. juni, nalazi se šibljje, nisko i više rastinje, koje već stvara uvjete za razmnožavanje i stanište štetočina. Zbog uslova kakvi jesu, zapaženi su i lošiji higijenski uvjeti, jer se gomila komunalni otpad. Put koji su napravili građani, odnosno prečica koja spaja ulicu 24. juni i Tome Mendeša u ljetnim mjesecima je skoro nemoguća za proći. Uređenjem i kultivisanjem zelenih površina stvaramo ljepše i zdravije uslove za život. Fotografije u prilogu.

Vijećnik **Škoro Hamdija (u ime Kluba vijećnika Naprijed BiH)** pokrenuo je slijedeće inicijative:

- 13/7.** Pokrećem inicijativu da se na svim autobuskim stajalištima na području općine Vogošća postave kante za otpatke.

Obrazloženje:

Kao što ste i upoznati na većem broju autobuskih stajališta na području općine Vogošća nema kanti za odlaganje sitnog otpada, te smo svjedoci da se na tim stajalištima skupljaju kamare otpadaka, jer ne postoje kante za smeće.

- 13/8.** Pokrećem inicijativu da se u ulici Spasoje Blagovčanina iza zgrade broj 12., gdje se nalazi sportsko igralište sa umjetnom travom adekvatno osvijetli, kako bi bilo uslovno za korištenje u noćnim satima, kao i sigurno za korisnike istog, jer bez rasvjete svjedoci smo da se skupljaju lica koja ne bi trebala i koji nisu korisnici terena.

Vijećnik **Handžić Jasmin (u ime Kluba vijećnika SDA)** pokrenuo je slijedeću inicijativu:

- 13/9.** Pokrećem inicijativu za uspostavu kontinuiranog kantonalnog programa plaćenih praksi za mlade kroz aktivne mjere zapošljavanja.

Obrazloženje:

Na osnovu analize položaja i potreba mladih općine Vogošća, a koja je rađena u okviru izrade Strategije prema mladima, kojom je utvrđeno da mladi nedostatak radnog iskustva prepoznaju kao jednu od ključnih prepreka pri zapošljavanju, predlažem inicijativu za uspostavu kontinuiranog i sistemskog programa plaćenih praksi za mlade, kroz postojeće aktivne mjere zapošljavanja koje provodi JU Služba za zapošljavanje Kantona Sarajevo. U ovom procesu Služba za zapošljavanje Kantona Sarajevo bi trebala preuzeti ključnu operativnu ulogu u realizaciji programa, ne samo kroz finansiranje, već i kroz aktivno povezivanje mladih bez radnog iskustva s javnim i privatnim poslodavcima, vođenje registara korisnika i poslodavaca, te praćenje ishoda programa. Program bi se realizirao kao posebna aktivna mjera zapošljavanja, jasno definisana u godišnjem Programu mjera zapošljavanja Kantona Sarajevo, s trajanjem od 6 do 12 mjeseci, uz obaveznu novčanu naknadu za mlade učesnike, mentorsku podršku kod poslodavaca i realnu mogućnost zaposlenja nakon završetka prakse. Radi postizanja stvarnih efekata, inicijativa podrazumijeva međuresornu saradnju Ministarstva za odgoj i obrazovanje Kantona Sarajevo (u dijelu povezivanja obrazovnih institucija i mladih), Ministarstva privrede Kantona Sarajevo (u dijelu uključivanja poslodavaca i dodatnih poticaja za zapošljavanje), te jedinica lokalne samouprave koje bi imale ulogu u informisanju mladih i identifikaciji lokalnih potreba tržišta rada, a po potrebi i sufinansiranja. Cilj ove inicijative je efikasnije korištenje već planiranih budžetskih sredstava za aktivne mjere zapošljavanja, smanjenje nezaposlenosti mladih i uspostava održivog mehanizma za sticanje prvog radnog iskustva.

Vijećnica **Šabić Dalia (u ime Kluba vijećnika DF)** pokrenula je slijedeće inicijative:

- 13/11.** U ime građana općine Vogošća pokrećem inicijativu za unapređenje održavanja kontejnerskih niša na području općine, s obzirom na izrazito loše higijensko stanje koje je prisutno na velikom broju lokacija.

Obrazloženje:

Građani se već duže vrijeme žale na prepunjene kontejnere, neuredne kontejnerske niše i širenje neugodnih mirisa, naročito tokom toplijih mjeseci. Iako se prema važećem rasporedu pražnjenje kontejnera vrši tri puta sedmično, praksa na terenu pokazuje da je to u mnogim

naseljima nedovoljno, posebno u gusto naseljenim dijelovima općine. Pored prostora oko kontejnera, dodatni problem predstavlja činjenica da se ne vrši redovno pranje ni samih kontejnera ni kontejnerskih niša. Zbog toga dolazi do nakupljanja nečistoća, širenja jakog i dugotrajnog smrada, te stvaranja uslova za okupljanje životinja (mačaka i pasa) koje u potrazi za hranom ulaze u kontejnere, čime se dodatno povećava rizik od širenja zaraza i narušava javno zdravlje. S tim u vezi, predlažemo:

1. Povećanje učestalosti praznjenja kontejnera na lokacijama gdje je evidentno da postojeće dinamike nisu dovoljne.
2. Uvođenje redovnog pranja kontejnera i kontejnerskih niša, naročito u proljetnom i ljetnom periodu.
3. Pojačan nadzor nad stanjem kontejnerskih niša i brzu reakciju u slučajevima prijava građana.

Smatramo da bi ove mjere značajno doprinijele unapređenju higijene, zaštiti javnog zdravlja i poboljšanju kvaliteta života građana općine Vogošća. Molimo KJKP „Rad“ da razmotri ovu inicijativu i u okviru svojih nadležnosti, preduzme potrebne mjere.

- 13/12.** Pokrećem inicijativu za sanaciju i uređenje ulice koja vodi prema Radića potoku, a koja se trenutno nalazi u izrazito lošem stanju.

Obrazloženje:

Kolovoz je neravan, sa brojnim izbočinama i oštećenjima, što otežava kretanje vozila i pješaka te umanjuje sigurnost učesnika u saobraćaju. Navedena ulica ima poseban značaj za građane općine Vogošća, jer vodi prema Radića potoku – prostoru koji predstavlja jedinu veću zelenu oazu i izletište u neposrednoj blizini centra Vogošće. Ovaj lokalitet svakodnevno koriste građani svih uzrasta, porodice sa djecom, rekreativci i šetači, te kao takav zaslužuje adekvatno uređen i siguran prilaz. S obzirom na frekventnost ulice i njen značaj, smatramo da je neophodno u narednom periodu izvršiti sanaciju kolovoza, nivelaciju i obnovu oštećenih dijelova, kako bi se osigurali sigurni i dostojanstveni uslovi za pristup ovom izletištu, ali i poboljšao opći izgled i funkcionalnost ovog dijela općine. Molimo nadležnu općinsku službu da izvrši uvid u stanje na terenu i poduzme odgovarajuće mjere u cilju sanacije i uređenja navedene ulice.

Vijećnik **Hebib Armin (u ime Kluba vijećnika SDP)** pokrenuo je slijedeće inicijative:

- 13/13.** Pokrećem inicijativu za uspostavu Zdravstvenog savjeta Općine kao stalnog stručno-savjetodavnog tijela.

Obrazloženje:

U skladu sa Zakonom o principima lokalne samouprave u Federaciji Bosne i Hercegovine, općine su dužne da, u okviru svojih nadležnosti, osiguravaju uslove za zaštitu i unapređenje kvaliteta života građana, što izričito uključuje i brigu o zdravlju stanovništva. Nadalje, Zakon o zdravstvenoj zaštiti Federacije BiH propisuje obavezu organa vlasti da aktivno učestvuju u planiranju, praćenju i unapređenju zdravstvene zaštite, posebno u segmentima javnog zdravlja, prevencije bolesti i zaštite interesa pacijenata. Također, Zakon o pravima, obavezama i odgovornostima pacijenata predviđa potrebu za mehanizmima koji omogućavaju učešće građana i zaštitu njihovih prava u zdravstvenom sistemu, što se upravo ostvaruje kroz zdravstvene savjete kao savjetodavna tijela na lokalnom nivou. Zdravlje građana predstavlja jednu od temeljnih vrijednosti svake lokalne zajednice i direktno utiče na socijalnu sigurnost, ekonomski razvoj i ukupni kvalitet života. Iako je organizacija zdravstvenog sistema u nadležnosti viših nivoa vlasti, općine imaju jasnu zakonsku i društvenu odgovornost da prepoznaju lokalne zdravstvene potrebe, iniciraju preventivne mjere i djeluju kao aktivan partner zdravstvenim ustanovama i nadležnim institucijama. U tom smislu, Zdravstveni savjet bi predstavljao institucionalni okvir kroz koji bi se ta odgovornost dosljedno i sistemski provodila. Zdravstveni savjet Općine imao bi zadatak da prati stanje zdravstvene zaštite na području općine, identifikuje ključne probleme sa kojima se suočavaju građani, te predlaže konkretne mjere i preporuke za njihovo rješavanje. Savjet bi davao mišljenja i prijedloge na planove i programe iz oblasti zdravstva, inicirao i podržavao preventivne, edukativne i promotivne aktivnosti, te učestvovao u kreiranju lokalnih politika koje doprinose očuvanju i unapređenju zdravlja stanovništva. Poseban akcenat bio bi stavljen na zaštitu prava pacijenata, dostupnost zdravstvenih usluga i smanjenje zdravstvenih nejednakosti, naročito kada je riječ o starijim osobama, djeci, osobama s invaliditetom i socijalno ugroženim kategorijama. Savjet bi bio sastavljen od predstavnika zdravstvenih radnika, korisnika zdravstvenih usluga, civilnog

društva, općinske administracije i drugih relevantnih aktera, čime bi se osigurala stručnost, transparentnost i stvarno učešće građana u odlučivanju o pitanjima od javnog interesa. Njegov rad bi se zasnivao na godišnjem planu i programu, uz obavezu redovnog izvještavanja općinskih organa. Važno je naglasiti da ova inicijativa ne predstavlja teorijski prijedlog, već provjerenu i zakonima utemeljenu praksu. Općine Centar, Novo Sarajevo i Stari Grad Sarajevo već su uspostavile zdravstvene savjete i kroz njihov rad ostvarile konkretne rezultate. Ovi primjeri potvrđuju da zdravstveni savjeti nisu formalnost, već efikasan alat za provođenje zakonskih obaveza općina u oblasti zdravstva. Imajući u vidu navedene zakonske odredbe, potrebe građana i pozitivne primjere iz drugih općina, smatram da je neophodno da i naša općina preduzme konkretne korake u ovom pravcu. Osnivanjem Zdravstvenog savjeta općina bi pokazala odgovoran odnos prema zdravlju svojih građana, ispunila zakonske obaveze i uspostavila mehanizam za kontinuirano unapređenje zdravstvene zaštite na lokalnom nivou.

- 13/14.** Pokrećem inicijativu za sanaciju oštećenih kamenih kocki na vanjskoj stranici spomenika koji krase kružni tok Vogošćanskoj petlji.

Obrazloženje:

Vogošća je jedno od rijetkih naselja u Bosni i Hercegovini koje se može pohvaliti činjenicom da su nam poznata imena njenih najstarijih stanovnika. Prema istraživanjima asistenta na Odsjeku za historiju Filozofskog fakulteta u Sarajevu, objavljenim u djelu „Antiqui homines Bosnae“ (Sarajevo, 2011), pronađeni kameni blokovi u Krivoglavcima ukazuju na postojanje impozantne rimske građevine – najvjerovatnije mauzoleja ili rimske rustikalne vile iz II ili III stoljeća nove ere. Rekonstruisana kamena ploča danas se čuva u stalnoj postavci Muzeja Sarajeva, dok njena replika s ponosom krase Vogošćansku petlju. Nažalost, uočena su oštećenja kamenih kocki na vanjskoj stranici spomenika, što narušava njegov estetski izgled, umanjuje simboličnu i kulturno-historijsku vrijednost, te može dovesti do daljnjeg propadanja i potencijalne opasnosti za učesnike u saobraćaju. S obzirom na značaj ovog spomenika za identitet Vogošće, ali i za promociju kulturno-historijskog naslijeđa rimske prošlosti našeg kraja, smatram da je neophodno da Općina Vogošća, putem nadležnih službi, u što kraćem roku izvrši sanaciju i adekvatno tehničko učvršćivanje kamenih elemenata, uz poštivanje konzervatorskih i estetskih standarda. Predlažem da se nakon sanacije uspostavi i redovan plan pregleda i održavanja spomenika, kako bi se spriječila slična oštećenja u budućnosti.

Vijećnica **Kobiljak Elvedina (u ime Kluba vijećnika SDA)** pokrenula je slijedeću inicijativu:

- 13/15.** Pokrećem inicijativu prema Ministarstvu saobraćaja Kantona Sarajevo za označavanje pješačkog prelaza/prijelaza na raskrsnici ulica: Šipska, Stara kaldrma i Kenana Brkanića (kod slastičarne „Han“) na Kobiljoj Glavi.

Obrazloženje:

Navedena raskrsnica je veoma prometna i nesigurna za prelazak pješaka, posebno djece koja svakodnevno prelaze raskrsnicu na putu do OŠ „Zajko Delić“ koja se nalazi u neposrednoj blizini raskrsnice. Označeni pješački prelaz osigurao bi lakši i sigurniji prelaz raskrsnice.

Vijećnik **Omerović Denis (u ime Kluba vijećnika SDP)** pokrenuo je slijedeće inicijative:

- 13/16.** Pokrećem inicijativu nadležnim službama za izmještanje ležećeg policajca – naselje Barica.

Obrazloženje:

Pokrećem inicijativu za izmještanje ležećeg policajca u naselju Barica, na dionici puta kod skretanja prema naselju Ugorsko. Trenutno se ležeći policajac nalazi prije samog skretanja, što u zimskim uslovima otežava ili onemogućava vozilima uspon zbog nemogućnosti hvatanja potrebnog minimalnog zaleta, jer je riječ o uzbrdici. Predlažem da se ležeći policajac izmjesti odmah nakon skretanja, čime bi se zadržala sigurnost, ali poboljšala prohodnost puta.

- 13/17.** Pokrećem inicijativu za hitno poduzimanje mjera vezanih za održavanje visokog i niskog rastinja uz prugu, a naročito na dijelovima gdje pruga prolazi kroz naseljena mjesta.

Obrazloženje:

Obraćam se s inicijativom da se nadležnim službama uputi zahtjev za hitno poduzimanje mjera vezanih za održavanje visokog i niskog rastinja uz prugu, a naročito na dijelovima gdje pruga prolazi

kroz naseljena mjesta. Primjeri takvih ulica su Stara željeznička stanica i Nova željeznička stanica, gdje zbog prekomjernog rastinja dolazi do smanjene preglednosti, osobito u proljetnom i ljetnom periodu. Takvo stanje je, nažalost, nedavno dovelo do tragičnog smrtnog ishoda gdje je i obećano da će se pruga održavati. Pored opasnosti koje prijete usljed smanjene vidljivosti, prisutnost neuređenog rastinja tokom ljetnog perioda dovodi i do sve češće pojave zmija, što dodatno ugrožava sigurnost stanovništva. Napominjem da ovu inicijativu ponavljam, s obzirom na to da na prethodno upućen zahtjev nije dostavljen odgovor. Nadam se da će se ovom prilikom problem konačno ozbiljno razmotriti i riješiti, ili barem da će Općina pronaći sluha i način da se ovo pitanje adekvatno riješi u interesu sigurnosti građana. Stoga tražim da se poduzmu odgovarajuće mjere čišćenja i redovnog održavanja prostora uz prugu, kako bi se osigurala sigurnost građana, a posebno djece, te spriječile daljnje nesreće.

Vijećnica **Curić Samira (u ime Kluba vijećnika SDP)** pokrenula je slijedeće inicijative:

- 13/18.** Na osnovu zaprimljenog odgovora Ministarstva saobraćaja i Direkcije za ceste, u kojem je navedeno da se postavljanje usporivača saobraćaja može izvršiti isključivo na osnovu izrađenog saobraćajnog projekta u skladu sa Pravilnikom o saobraćajnim znakovima i signalizaciji, pokrećem inicijativu da nadležna općinska služba pokrene postupak izrade saobraćajnog projekta za postavljanje usporivača saobraćaja na lokaciji Blagovac, te da se isti, nakon izrade, uputi na pribavljanje potrebnih saglasnosti Ministarstva saobraćaja i drugih nadležnih institucija, kako bi se mogle poduzeti dalje zakonom propisane mjere.

Obrazloženje:

Na navedenoj lokaciji postoji izražen problem prebrze vožnje, što ugrožava sigurnost pješaka, posebno djece, starijih osoba i stanovnika ovog naselja. S obzirom da su nadležne institucije jasno navele da je saobraćajni projekat preduslov za dalje postupanje, smatram da je neophodno da Općina preuzme inicijativu i obezbijedi izradu navedenog projekta, kako bi se omogućilo zakonito i stručno rješavanje ovog sigurnosnog problema.

- 13/19.** Pokrećem inicijativu da se izvrši nasipanje tampona na kraku slijepe ulice koji se odvađa od ulice Blagovac V, počevši od kućnog broja 23 pa do kraja ulice.

Obrazloženje:

Predmetni krak ulice trenutno je u izrazito lošem stanju, što otežava normalno kretanje stanara, posebno u periodima kiše i loših vremenskih uslova. Imajući u vidu osnovne potrebe građana koji koriste ovu ulicu, smatram opravdanim i nužnim da se, kao privremeno i tehnički prihvatljivo rješenje, izvrši nasipanje tampona, čime bi se znatno poboljšala prohodnost i sigurnost saobraćaja. Molim nadležnu službu da razmotri ovu inicijativu i u skladu sa mogućnostima, poduzme potrebne korake za realizaciju navedenog zahvata.

Vijećnik **Pašagić Almir (u ime Kluba vijećnika SDP)** pokrenuo je slijedeće inicijative:

- 13/20.** Pokrećem inicijativu za novu biciklističko-pješačku i rekreativnu stazu od kružnog toka kod hotela Sunce do ulaza u staru industrijsku zonu na mjestu željezničkih šina. S obzirom da Vogošća nema biciklističku i pješačku stazu, predlažem da se pruga koja prolazi kroz centar Vogošće uredi kao cesta sa prugom i omogući normalno korištenje za građane a u nekim posebnim situacijama i za vozila hitne pomoći, policiju i vatrogasce. Sadašnja pruga koja prolazi kroz centar Vogošće služi za transport roba iz Pretisa i Peny plus i taj voz dolazi jednom u dva mjeseca. Novoizgrađena staza za rekreaciju, šetnica za rehabilitaciju, a u ljetnom periodu moglo bi se održavati i kros takmičenja svih uzrasta. Sada postojeća pruga predstavlja ružnu sliku u centru Vogošće, a česte su i povrede građana i djece na šinama koje strše iz neuređenog zemljišta.

- 13/21.** Pokrećem inicijativu da sve javne institucije Kantona Sarajevo da imaju po jedno električno auto. Grad Sarajevo je često najzagađeniji grad na svijetu i dugo godina će trebati da se smanji koncentracija smoga u maglovitom Sarajevu. Ako bi Vlada Kantona Sarajevo donijela jednu preporuku da sve javne ustanove imaju po jedno električno auto koje bi koristili samo na području Kantona Sarajevo bio bi prvi znak da želimo smanjiti koncentraciju smoga u Kantonu Sarajevo. Ta politika bi se prenijela i na taxi službe, a javni prijevoz zadnjih godina ima politiku da zagađenje bude minimalno, jer uspostavom mreže trolejbusa i novih tramvajskih kilometara pruge se značajno smanjuje zagađenje našeg grada. Inicijativu dostaviti Vladi Kantona Sarajevo i svim općinskim i javnim ustanovama na području Kantona Sarajevo.

Vijećnik **Gljiva Bego (u ime Kluba vijećnika S BiH)** pokrenuo je slijedeću inicijativu:

13/22. Pokrećem inicijativu za sistemsko rješavanje saobraćajnog zagušenja na pravcu Vogošća – Sarajevo kao kantonalnog prioriteta za 2026-2027-2028. godinu. I ako je ova dionica puta Prve transferzale proglašena javni interesom Kantona Sarajevo radovi se i dalje sporo realizuju. Inicijativa se upućuje: Vladi Kantona Sarajevo, Ministarstvu saobraćaja Kantona Sarajevo, Ministarstvu prostornog uređenja, građenja i zaštite okoliša Kantona Sarajevo i Direkciji za ceste Kantona Sarajevo.

Obrazloženje:

Općina Vogošća predstavlja jedan od glavnih i najopterećenijih ulaza u grad Sarajevo. Dugogodišnji saobraćajni kolaps na ovom pravcu ozbiljno utiče na svakodnevni život građana, privredne aktivnosti, dostupnost javnih usluga, kao i na kvalitet zraka i zdravlje stanovništva. Dosadašnji pristup rješavanju ovog problema bio je parcijalan, bez jedinstvenog, dugoročnog i operativnog plana, što je rezultiralo višegodišnjim kašnjenjima. S obzirom na to da se radi o saobraćajnom problemu koji prevazilazi nadležnosti Općine Vogošća, neophodno je da Vlada Kantona Sarajevo preuzme punu koordinacijsku i stratešku ulogu. Predlaže se:

1. Da Vlada Kantona Sarajevo proglasi saobraćajni pravac Vogošća – Sarajevo kantonalnim infrastrukturnim prioritetom, sa jasno definisanim rokovima.
2. Da se izradi jedinstveni kantonalni plan saobraćajnih rješenja za sjeverni ulaz u Sarajevo, koji bi uključivao realizaciju i Prve transferzale, alternativne pravce.
3. Da se osigura kontinuitet finansiranja projekata bez prekida između budžetskih godina.
4. Da se uspostavi stalna koordinacija sa Općinom Vogošća, uz redovno informisanje Općinskog vijeća.
5. Da se razmotre privremene mjere rasterećenja saobraćaja do realizacije strateškog projekta Prve transferzale.

Zaključak:

Ovom inicijativom poziva Vladu Kantona Sarajevo da pitanje saobraćaja na sjevernom ulazu u Sarajevo tretira kao strateško pitanje od javnog interesa. Te da se u skladu sa kategorijom Javnog interesa aktivnosti na ovoj dionici i odvijaju. Molimo da se ova inicijativa razmotri i da se Općinskom vijeću Vogošća dostavi pisani odgovor sa planom daljih aktivnosti.

RUKOVODILAC
STRUČNE SLUŽBE ZA POSLOVE
OPĆINSKOG VIJEĆA

Crvenjak Elvir